

436
AVX

FRANÇOIS FRATRICIDES,

PAR
VN ECCLESIASTIQUE.

Videte ne ab inuicem consumamini, Galat. 5.15.



A PARIS.

M. DC. LII.

CASE

F

39

.326

1652 au


THE NEWBERRY
LIBRARY

1652 au

1652 au



Aux François Fratricides.



Toy, ô Nation indomptable par autre que par toy-mesme! Pourquoy cherches-tu à te dompter, pour perdre en te voyant domptée la gloire que tu pretens, en te voulant dompter? A vous, ô François qui vous coupez la gorge, & faites contre vous-mesme, ce que les Nations Ennemies, & les Guerres estrangeres n'ont sçeu ny pretendu faire: mais qui plustost vous égorgez en leur faueur, & plus heureusement pour elles, que si elles mesmes en executoient l'entreprise!

Que cherchez-vous, ie vous prie, & quel est le but de vostre rage? (si toutefois la rage peut regarder, & se proposer aucun but) vous cherchez à vous vaincre, & l'emporter les vns sur les autres, comme des taureaux dans vn parc, des bestes farouches dans vne forest, & des barbares dans leurs vastes solitudes. L'homme doit chercher de vaincre par la raison: car elle est la prerogatiue dont la Nature l'a orné par dessus tous les Estres d'icy bas: laquelle n'ayant pas armé son corps, comme elle a fait le reste des animaux, en affilant ou en durcissant des parties de leur corps, a fait assez paroistre que la victoire que l'homme emporte sur vn autre, doit estre conquise par la pointe de la raison.

Posez donc vos armes empruntées, & reprenez l'vsage de vos armes naturelles, qui ne sont autresque la raison, & assortissez-les de l'armure de Dieu dōt parle l'Apōtre S. Ephes. 6. i.

1. Pet. 4 1.

Paul, & cōme parle l'Apostre S. Pierre; Armez-vous de pensées Chrestiennes. Je suppose dōc avec vous, & avec tous, qu'il n'est en aucune façon question en ce different, qui vous diuise, s'il faut suiure le party du Roy: Car le Roy ne fait iamais party dans son Estat; c'est tousiours le fonds de l'affaire: & il n'y a ny François, ny Chrestien qui puisse mettre cela en probleme. C'est aussi, non seulement la crainte du chastiment, mais encores la conscience, qui nous oblige dans les sentimens de nostre Religion, à nous tenir inuiolablement au seruice du Roy. Mais ie dis de plus, que les François ont vne telle tendresse & reuerence pour leurs Roys, remarquée mesme par l'Histoire estrangere, que peut-estre n'en y a-t'il pas vn pour le present qui ne conferue dans son cœur ce caractere de respect enuers le Roy: & qu'il n'y a que le desespoir qui ne considere, ny raison, ny religion, ny dommage, qui soit capable d'effacer ce respect.

Puis donc que vous conuenez tous du seruice du Roy, & qu'il n'y en a pas vn qui ne regarde son Authorité cōme l'obiet de sa pieté dans la Religion, & le but de son employ dans l'Estat; Comment croyez-vous établir sa gloire, & procurer son seruice, en déchirant ses membres, mettant à mort ses plus considerables & plus vtils subiets, & versant de son corps, qui est tout son Estat, le Sang le plus pur & le plus vigoureux? que luy peut-il reuenir de bon en perdant ce qu'il ne pourroit conferuer assez cherement: Et quelle obligation vous a-t'il, que vous le luy ayez rauy? mais quand il vous aura perdu, vous qui perdez les autres, & qui vous lancez dans vn mesme peril; ne l'exposez-vous pas tout à fait, le laissant sans aucun secours? Mais quel seruice luy pouuez-vous rendre, en rauageant ses Campagnes, desolant ses Villes, meurtrissant ses Peuples, & le rendant vn Roy d'un effroyable desert?

Quoy! la France n'a-elle point assez d'Ennemis, sans que vous le foyez aussi? & faut-il que les Nations estrangeres ayant quasi cessé de l'attaquer, vous entriez en leur place

place, pour la défaire par elle-mesme, & estre comme les Ministres de leur fureur, executant par vous-mesmes ce qu'elles auoient desespéré de pouuoir faire de leur part, en sorte qu'elles n'ont qu'à se rendre spectatrices de vos fraticides, & d'attendre d'en recueillir vne moisson qui surpasse leur esperance?

Mais pour vous parler plus particulièrement comme à des Chrestiens (bien que ce que i'ay desia dit vous touche encore en cette qualité) vous estes Chrestiens pour faire briller vos espées contre les Infideles, & vous les tournez contre les Prestres, & contre les lieux sacrez? Vous épanchez le sang de vos veines: Car & vous, & ceux que vous massacrez, & faites nager dans leur sang, n'avez la vie de Chrestien que dans la participation du mesme sang du Fils de Dieu, versé de ses veines dans celles de tous les fideles. Est-ce vne voye pour affermir le Throsne du tres-Chrestien de prophaner les Temples, commettre des insolences & inhumanitez, & rendre son Royaume le Theatre des Furies, & l'image de l'Enfer? Croyez-vous seruir vostre Roy en prouoquant contre luy la colere de son Dieu, & son Roy, & par des actes d'hostilité qui vont contre luy par contrecoup, luy apporter vn vtile secours?

Vos pretendus interets s'en iront en fumée, & l'interest de vostre salut, auquel vous ne songez pas, échapera de vos mains. Mais l'horreur d'un inconceuable remors, & le comble des tourments de la Iustice diuine vous accueilleront, & vous serez leur proye & leur victime sans fin. Car s'il faut taster le pouls du cœur, il se trouuera (ie ne le dis pas de tous, mais peut-estre le pourrois-ie dire de plusieurs) que le seruice du Roy qu'ils ont graué dās le cœur, est le seruice de celuy qu'on appelle le Roy du Monde; ainsi que Iesus-Christ appelle le Démon le Prince de ce Monde; Ce Roy, c'est l'interest, & c'est pour luy & pour leurs vaines esperances qu'ils trahiroient volontiers leur patrie, & coniureroient sa ruine: Malheureux qu'ils sont, & sans humanité, la vie d'un simple Soldat ou du moindre des Païsans, deuant estre plus pretieuse de-

uant eux, que tous les vains attraits de leurs fortunes imaginaires:

Terre. lib. 3.
Idol. c. 19

Et pour vous faire voir plus particulièrement encore l'horreur de vos combats, s'il falloit en demeurer à Tertullien: En premier lieu ie dirois avec luy que Dieu fait homme a desarmé tous les Soldats, lors qu'il desarma S. Pierre, luy faisant remettre son espée dans le fourreau, bien qu'il l'eust tirée pour la iuste defence de son maistre.

Omnem militem Dominus in Petro exarmando discinxit.

Jud. 7.
12.

Mais ie m'arreste à vous faire conceuoir l'horreur de vos combats, entant qu'ils vous rendent Fratricides. Car ce n'est que l'acte des Nations Infideles de tourner son glaue l'un contrel'autre de mesme Nation. Il est dit au Liure des Iuges, que Gedeon & ses Soldats criastout hairement, *Glauius Domini & Gedeonis*, le glaue du Seigneur & de Gedeon, tout le Camp des Madianites ennemis du Peuple de Dieu fut mis en trouble: Et adiouste le texte; *Immisitque Dominus gladium in omnibus Castris, & mutui se cede truncabant.* Dieu fit passer le glaue sur tout le Camp, & les Soldats s'entretuoient eux-mesmes: & se traitant comme des ennemis, se deffaisoient les vns les autres.

1. R. g. 14.
20.

Et au premier liure des Roys, ces paroles y sont couchées. *Conclamauit ergo Saul, & omnis populus qui erat cum eo, & venerunt usque ad locum certaminis, & ecce versus fuerat gladius unuscuiusque ad proximam suam, & cedes magna nimis.* Saul voyant le trouble que Ionatas auoit excité dans le Camp des Philistins, s'écria avec toute son armée; & ils se portèrent iusques au lieu du Combat: Et ô merueille, les Philistins s'entrechoquans, auoient tourné la pointe de leurs espées les vns contre les autres, dont ils firent d'eux-mesmes vn grand & horrible carnage; & si bien cela arriua entre ceux qui composoient de mesmes Armées; le mesme en est-il de ceux de mesme Nation.

1. Par. 18.
30.

Les Israélites ayant fait vn grand butin sur leurs Freres de mesme Nation, & Religion, vn Prophete nommé Oded fut au deuant des vainqueurs, & leur parla ainsi

Peccastis enim super hoc Domino Deo vestro: sed audite consilium meum, & reducite captivos, quos adduxistis de Fratribus vestris, quia magnus furor Domini imminet vobis. Vous auez en cela offensé vostre Dieu, mais écoutez, & suiuez le conseil que ie vous donne; renuoyez vos Freres captifs, d'autant qu'un grand & iuste couroux de Dieu pend sur vos testes. Après quoy leurs Princes dirent à toute l'armée: Vous n'introduirez pas absolument les captifs dans la Ville, de crainte d'offencer Dieu; pourquoy voulez-vous augmenter le nombre de nos offenses, & par de nouvelles fautes combler les anciennes? Car c'est en effet un enorme peché, & la colere & la fureur de Dieu va fondre sur le Peuple d'Israël: *Non introducetis huc captivos; ne peccemus Domino. Quare vultis adiacere super peccata nostra, & vetera cumulare delicta? grande quippe peccatum est, & ira furoris Domini imminet super Israël.*

Il est vray qu'il est rapporté au liure des Iuges que toutes les Tribus d'Israël s'assemblerent pour faire la guerre à vne seule, & la destruisirent tout à fait: mais c'estoit pour chaltier l'infame forfait qui auoit esté commis en vne ville de cette tribu, & duquel ils ne voulurent pas liurer les coupables, en estans requis par toutes les tribus, cōme il est dit dans cette histoire: & avec tout cela il y est dit des Vainqueurs: *Magno ululatu caperunt flere, dicentes: quare Domine Deus Israël, factum est hoc malum in populo tuo, ut hodie vna tribus auferretur ex nobis?* Ils se prirent à pleurer, avec des hurlemens effroyables, en s'adressant à Dieu, & disant; d'où peut estre venu, Seigneur & le Dieu d'Israël, ce grand malheur dans vostre peuple, qu'une de nos tribus soit esteinte, & nous aye esté enleuée? Et plus bas: *Uniuersusque Israël valde doluit, & egi penitentiam super interfectione vnius tribus ex Israël.* Tout le peuple d'Israël conceut vne grande douleur, & se repentit amèrement sur la destruction d'une tribu d'Israël.

Voyla donc de quoy former en vous l'auersion de vos fraticides, qui sont de plus preiudiciables à vos desseins. Car ce que Iudas disoit avec hypocrisie, ne le peut-

Mat. 16. 8.

on pas dire avec verité de tant de sang que vous respan-
dez : *Vi quid perditio hac?* A quoy reuiet cette perte de
tant de sang : Quoy faut-il bouleuerfer vn Royaume, in-
quieter & destruire, & remplir d'horreur & de sacrilege
la France, qui estoit le chef-d'œuvre de la nature pour
l'humanité, & dans la religion l'exemplaire de la pieté?
Faut-il exposer à la risée des nations estrangeres, à l'op-
probre de tous les siecles, & au iouiet des escriuains vostre
patrie, pour ie ne sçay quoy qu'on ne sçauoit dire, qui
l'occupe, l'embarasse, la mine, & la destruit, sans que
personne du dehors la pousse à sa ruine; & qui semble se
vouloir arracher de ses propres mains sa reputation, son
repos & sa vie : & qui depuis vn si long temps plus elle
se veut démesler de ses filets, s'y est d'autant plus enlas-
sée.

Est-il possible qu'il ne se rencontre pas dans vn si vaste
Royaume, remply de personnes de sçauoir, d'autorité
& de pieté, quelqu'un qui se iette entre deux, & comme
vn Moïse François vous represente vostre naissance &
vostre Religion; & fasse ce qu'il est dit de Moïse, adopté
par la fille de Pharaon, & nourry dans la Cour. *Recon-*
cilabat eos in pace, dicens: *Viri, fratres estis, ut quid no-*
cetis alterutrum? Il taschoit de les remettre en paix, leur
disant; Que faites-vous, Messieurs, vous estes tous Iuifs,
de mesme naissance & religion, & ainsi freres, pourquoy
cherchez-vous à vous faire du tort, & vous apporter du
dommage? Ce qui fut en effet le fondement de l'exalta-
tion de Moïse; car apres cette action, s'estant retiré au
desert, Dieu luy apparut dans le buisson ardent, & luy
donna la commission d'enleuer des mains de l'Egypte
son peuple à force de prodiges, & de coups redoublés de
la verge qu'il luy mit en main; tant il est vray que Dieu
benit ceux qui entreprennent la reconciliation, & font
les affaires de la paix.

Ne soyez pas cause que Dieu retire tout à fait de la
France son secours fauorable; n'entrez point en presom-
ption, pour la singuliere protection qu'il luy a si souvent
ref-

testimoignée, dans les dernières périodes de ses malheurs, où il sembloit qu'elle deuoit perir sans ressource. Car comme les œuvres de Dieu ne se font point au moule: l'oubly dans lequel vous vivez de ses anciens bienfaits, & le surcroist de vos nouveaux crimes peuvent bien porter Dieu à abandonner & laisser couler à fonds cette barque chérie, qu'il auoit iusques icy si heureusement gouvernée.

Vous voyez, ie n'en doute pas, le bord du precipice, sur lequel vostre patrie a posé son dernier pas; que faites-vous pour l'en retirer? mais que ne faites-vous pas pour luy donner le branle, & rendre plus glissant le pas de sa ruine? La France, dites-vous, se ruine, se perd & se consume: & le lendemain vous ne manquez pas de faire ce qu'on voit qu'il la ruine, la perd & la consume. Vous dites pourtant que c'est pour le service du Roy: le vray empire des Grands, & le plus assuré c'est l'empire sur les cœurs, sans lequel tout le reste est bien foible: & n'est ce pas les luy aliener, que de les persecuter par vos hostilités, inhumanités, & profanations des choses saintes? Ils seront toujours criminels & misérables, s'ils s'éloignent de son service: mais les miseres presentes & les plus proches bannissent souvent l'apprehension des futures, & des plus éloignées: & ou font des criminels volontaires, ou forment des consciences à sa poste, pour le soulagement de ceux qui en sont pressés.

Voulez-vous tout à bon porter vilement les armes pour le service du Roy, vivez comme des Guerriers Chrestiens, n'usans pas de vos glaiues, comme des outils de vos passions, ou comme font les tygres de leurs griffes: Car comme le Iuge ne doit point yser de la loy par caprice, ou pour assouvir ses passions; aussi ne devez vous pas le faire de vos armes. Imitiez ceux qui restablissoient la ville de Ierusalem, desquels il est dit: *Vna manu faciebat opus, & altera tenebat gladium.* Cette partie de l'armée qui estoit destinée à l'ouurage, tenoit

d'une main son glaive, & de l'autre bastissoit la ville de Ierusalem. Car ainsi vous devez dans l'usage mesme de vos Armes vous construire la Ierusalem future, & l'estat eternal de vostre bonheur, quand le glaive, & les dangers qui de moment en moment volent autour de vous, vous auront transporté en vn monde où vous devez estre sans fin. Imitez encor ce Centenier Cornelius dont il est parlé dans l'Escripture, où il est appelé *Religiosus, ac timens Deum, cum omni domo sua*. Homme pieux & religieux craignant Dieu, avec toute sa famille. Et plus bas il est appelé, *vir iustus ac timens Deum, & testimonium habens ab uniuersa gente Iudeorum*. Homme iuste, legal, & craignant Dieu, & dans l'estime de toute la Iudée; lequel dit à saint Pierre: *Nunc ergo omnes nos in conspectu tuo adsumus, audire omnia quaecumque tibi precepta sunt à Domino*. Nous sommes, dit-il, tous deuant vous pour entendre de vous tout ce que Dieu vous a commandé de nous dire: & pour donner aussi bien l'exemple d'un soldat cōme d'un Cētenier: il est dit là-mesme, que le Centenier appella deux de ses domestiques, & soldats craignans Dieu. *Vocauit duos domesticos suos, & militem metuentem Dominum*. C'est le moyen d'ailleurs d'auoir vn courage inuincible, l'esperoir plus iuste d'une victoire moins perilleuse, & la protection de Dieu plus apparemment fauorable; ainsi est-il dit des genereux Machabées: *Iudas verò & qui cum eo erant, inuocato Deo, per orationes congressi sunt; manu quidem pugnantes, sed Dominum cordibus orantes, prostrauerunt non minus triginta quinque millia, praesentia Dei magnifice delectati*. Iudas & ceux qui estoient avec luy, ayant fait leur priere à Dieu, fondirent sur les ennemis, la priere encore dans le cœur & dans la bouche, & cōbattans à la verité vaillamment les armes au poing, mais aussi ne cessans de prier, ils mirent par terre non moins de trente-cinq mil hommes, animés d'un courage plein d'allegresse, se representans avec generosité & magnificence la presence de Dieu, pour la querelle duquel ils estoient en-

A. 10. 1.

v. 22.

v. 33

v. 7.

2. Mach. 17.
25.

trés dans le combat. Et comme il est dit ailleurs, lors que l'Escadron de Iudas parut le premier en vne autre occasion, l'effroy faist ses ennemis conçu par la presence de Dieu qui jette sur tout son invariable regard; en sorte que chacun mettoit en fuite son compagnon, *Cum-^{1. Mach. 12. 22.} que thors Iuda prima apparuisset timor hostibus incussus est ex præsentiâ Dei, qui vniuersa conspiciat: & in fugam versi sunt alijs ab alijs.* Ce qui fait encore voir ce que j'ay dit cy-dessus; que de s'en prendre les vns contre les autres, & s'attaquer en mesme Nation, ça esté des terreurs dans les Nations infideles.

Ce sont ces causes qui vous obligent plus que toute autre profession d'estre tousiours bien avec Dieu, conseruer son amitié, & le prix inestimable de sa grace, l'estimant le plus riche trhesor, la pretention la plus haute, la fortune la plus éleuée qui puisse frapper icy bas nos yeux, occuper nos pensées, animer nos desirs, & posseder nos cœurs. C'est aussi le moyen de faire que vos armes soient, comme dit le Prophete, *Semen pacis*, La semence de la paix. Cette moisson estant digne d'une telle semence: Au lieu que l'ysage contraire des armes est vn banissement de la Paix qui merite que Dieu la refuse cōme à des indignes, quelques instances longues & publiques prieres qu'on luy offre sans cesse. Pour donc conclure par où j'ay commencé, ne témoignes pas par vos actions que vous auez le cœur & les sentimens de ceux que l'Escripture condamne d'impieté, & disent ses paroles. *Sit autem fortitudo nostra, lex iustitiæ.* Sap. 2. 11.

Que la force soit la Loy de vostre Iustice c'est vne parole execrable, & qui n'est que dans la bouche de ces impies. Mais qu'au contraire vostre Loy comme en des hommes raisonnables & Chrestiens soit la Loy dont parle le Prophete. *Lex veritatis.* La Loy de la verité, qui est dans les maximes de la Religion & de la raison, & d'une saine conscience. *Malac. 2. 5.*

C'est, Messieurs, ce que j'auois à vous représenter pour vostre seruice, m'estimant heureux de prendre le titre.

que l'Apostre se donne, lors qu'il dit: *Nos autem seruos*
uestros per Iesum. Nous autres qui sommes vos seruiteurs
 en Iesus-Christ: Mais plus pour le seruice du Roy ie le
 regarde comme l'objet de ma veneration que la Religion
 me propose, ie desire le seruir inuolablement en tout ce
 que ie tiens de Dieu auteur de la nature & de la grace,
 qui m'oblige de le seruir en tous les deux. Ie ne doute
 pas qu'il n'y en aye qui taschent de le seruir chacun se-
 lon sa profession aux occasions presentes: Mais aussi ne
 doute-je pas non plus qu'il n'y en ait qui pourroient en ce
 sujet seruir l'Estat plus vtilement, le guerir de son mal,
 le soutenir par leur secours favorable; & qui pourtant
 ie laissent aller dans sa pante; voyent ces accez, & se con-
 tentent de dire, qu'il est malade, le voyent donner de la
 teste dans l'abyssine, & ne crient pas mesme apres luy pour
 luy faire apprehender son deuil. Où est donc la charité, où est le zele, où est l'obligation
 des membres enuers leurs Corps? A quoy reserve-t-on
 l'esprit & le jugement, le sçauoir, l'autorité, le coura-
 ge, la pieté, & le zele? On se contente de s'entretenir des
 malheurs, des euénements, & de dire, tout est perdu:
 mais, voyés, traités de ce quis'y peut apporter de remede,
 esclairez nous les grands & les petits, parlons à qu'il faut,
 employons nous en ce que nous pouuons. C'est iusques
 où ils ne vont pas. Ils sont comme ceux donc il est parlé
 en l'Euangile: *Et reuersi sunt unusquisque in domum suam.*
 Chacun apres auoir discouru de ce qu'ils feroient sur ce
 dont il estoit question; & s'estre vn peu eschauffés s'en
 retournèrent en sa maison sans rien conchirre, oubliant ou ne-
 gligeant d'y faire autre chose: Car ceux-cy sont le mes-
 me, laissant aller les affaires & le public le courant, ainsi
 qu'ils croyent de son ineuitable malheur; mais pour quoy
 faut-il le croire ainsi? Car bien que ce que nous ressentons,
 & la difficulté d'en trouuer l'issue; & soit vn effet des me-
 naces couchées dans le Prophete. *Et tribulabo homines,*
& ambulabunt ut caci quia Domino peccauerunt, Ie bat-
 tray les hommes de mon fleau; & ils iront à tastons com-
 me

me des aueugles, d'autant qu'ils ont offensé leur Dieu; Et bien que les issues de toutes ces affaires ne se presentent pas à nos esprits aueuglés de l'essein de diuerses passions qui estouffent l'esprit du Christianisme en vn si grād nombre de personnes; toutesfois il ne faut pas se pocher encore dauantage les yeux par le desespoir, ou par la negligence à chercher son remede: mais ostant la cause de l'aueuglemēt, il faut tascher de recouurer la clarté de la veüe d'vne diuine & esclairée prudence pour chercher ce remede. Bref, bien qu'il semble qu'il soit vray de dire ce que dit le mesme, *Horribilis Deus super eos*: Dieu est horrible en la maniere de nous chastier, il veut pourtant que nous esperions en luy, lors mesme qu'il nous rait la vie, & que nous disions avec Iob; *Etiam si occiderit me, in ipso sperabo*: Il a beau fondre sur moy avec le torrent de ses chastimens; le periode de leur mal, c'est de m'oster la vie; ils me l'osteront bien, à la verité, mais non iamais l'esperance en celuy mesme qui me froisse sous la pesanteur de sa main; & le dernier soufflé de ma vie sera le respir d'vn espoir en sa diuine Clemence; C'est ce qu'il veut de nous; reprenant en saint Pierre le peu de confiance en luy, lors mesme que la tempestel'engloutissoit sous les eaux. *Modica fidei quare dubitasti?* Et il est dit en la Sageſſe. *Bona spei fecisti filios tuos*; Vous auez fait, ô mon Dieu, que vos enfans soient des enfans de bōne esperance. Mais il ne faut pas que ce soit vn espoir oisif & perclus; mais plutôt vn espoir actif & remuant, qui applique les moyens & les voyes que Dieu nous a laissé dans les ordres de la Religion, dans les lumieres de la raison, & dans les exemples des choses du passé.

Mais nous auons vne vertu vuide de force, preste à recevoir des compliments & des louanges, mais non pas des opprobres & du rebut, ny à souffrir pour le prochain: Vertu bien eloquente lors qu'il ny a rien à craindre, & muette quand il y a de la perte ou du peril; à faire, ou à parler. Nous nous verrons tout à coup accablés sous les ruines, apres auoir fort medité, & bien discouru de la vertu;

pour ne luy auoir pas donné son veritable employ; nous aurons manié la Sainte Ecriture, & passé souuent sur le courage, & les diuines entreprises des Prophetes & des Apostres, comme sur vne chose inutile à nos maux. Nous voudrions bien qu'on parlât, mais nous ne voulons pas parler nous mesme; s'il eût question des aduantages, nous les voulons emporter sur les autres; mais s'il s'agit du trauail, du hazard, ou de surmonter sa crainte, nous renuoyons le tout sur autrui, & voulons bien le deferer aux autres.

Amos 9. 8.

1. Machab.
2. 29.

Il est vray qu'il faut faire penitence, *Super Regnum peccans*, sur le Royaume pecheur, comme parle le Prophete, qui par ses énormes pechés attire sur soy le juste chastiment de son Dieu par la permission de tant de mal qu'il souffre, & duquel il se peut dire ce que dit le Prophete, *Vniuersa domus Iacob induit confusionem*: Toute la Maison de Iacob s'est reuestüe de confusion. Mais ce n'est pas que, comme celuy qui est atteint de la maladie corporelle, laquelle il doit prendre cōme vn chastiment de Dieu, ne laisse pas d'employer les remedes pour recouurer sa santé: Qu'on ne doieue aussi apporter tout le remede possible pour deliurer sa Patrie des maux qu'elle souffre, mesmes à raison de l'enormité de ses vices, pour l'aider d'en tirer le profit que Dieu en pretéd. Il faut donc faire penitence; mais comme S. Iean Baptiste, dont la penitence n'estoit pas sterile, estant la source d'une diuine liberté à parler à tous petits & grands, & en leur montrant l'agneau, il leur monstroït en mesme temps la voye pour aller apres luy. Il faut deschirer sa crainte, dissiper sa honte, rompre avec tout, pour la gloire de son Dieu, & le secours de son prochain, ou il y a bien plus de peine qu'à deschirer son corps.

Se taïse donc qui voudra, ou celuy qui iuge qu'il est bon de se taire: Pour moy ie m'estimerois dur de cœur, d'un costé, & bien delicat de l'autre, & traistre à la Religion, à la raison, au veritable seruice du Roy, & au zele

du prochain, dont la pauvreté & les miseres font le paré
des ruës de Paris, & jonchent la campagne, si ie gar-
dois le silence en vn si grand, si évident, & si vniuer-
sel peril de ma Patrie.

2. Machab. 5. 6.

*Iason verò non parcebat in cade ciuibus suis, nec cogi-
tabat prosperitatem aduersum cognatos malum esse maxi-
mum, arbitrans hostium & non ciuium se trophæa captiu-
rum.*

FIN.



2. 7. 1881.

In hoc non participat in eadem civitate sua, nec cogit
 aliquid proprium a se habere cogitator malum esse.

